

lis est Patri, quam promisit dilectoribus suis,
et quo nos præcedens non deseruit.

COMMENTARIUS.

1. Hunc articulum proponit D. Thom. ut explicet modum et ordinem quo Christus per quadraginta dies discipulis apparuit et cum eis conversatus est. Et imprimis in corpore cum solutione ad 1 optimam rationem reddit, ob quam non oportuit per eos dies continue cum illis semper versari, ne nimia familiaritas occasionem præberet existimandi, eum ad idem genus vitæ mortalis redisse. Unde, sicut ad veritatem resurrectionis ostendendam, oportuit ut sapienter appareret, ita ad commendandam gloriam resurrectionis operæ pretium fuit interponere aliquas moras, et non continue cum eis conversari. Addit Justinus, q. 48 ad Orthodox., voluisse Dominum desuper facere discipulos suos ab aspectu præsentiaque sui corporis, eamque ob rem, quo tempore versabatur in terra post resurrectionem, non omnino eis se in conspectum præbuisse, sed per vices utrumque fecisse, ut ab eis et cerneretur et non cerneretur. Addo etiam id fuisse expediens ad fidei exercitium et probationem, spei quoque et charitatis augmentum, ac deinde hunc modum esse accommodatum statui hujus vitæ, in quo non possunt homines continue frui rebus divinis.

2. Dubium.—Responsio.—Hac vero occasione querit D. Thomas in solutione ad 2, quo in loco fuerit Christus illis diebus, quando a discipulis recedebat. Et nihil aliud respondeat, quam hoc esse incognitum, cum Scriptura nihil tradat, et in omni loco sit dominatio ejus. Quod verum est de cognitione certa et indubitate. Idem vero D. Thomas, in 3, d. 22, q. 3, art. 2, q. 3, ad 3, conjectura utendo, significat fuisse in paradyso terrestri; quia dicit in eo fuisse animas quæ cum Christo ab inferis ascenderunt; et idem docet Bonaventura, in Meditat. vita Christi, c. 19; Nicephorus, lib. 1, c. 31, idem significat, dum ait Christum eduxisse animas Sanctorum ex sinu Abrahæ, et in paradyso terrestri collocasse. Quod etiam sentit Justinus, q. 75, 76 et 85; et Irenæus, l. 5 Contra hæreticos; qui in hunc modum interpretantur illa verba: *Hodie mecum eris in paradyso*. Sed supra ostendimus non posse hæc verba de paradyso terrestri intelligi, quia eo die non fuit Christus in paradyso terrestri, sed in inferno. Hæc ergo sententia incerta est, præsertim cum valde du-

bium sit an paradyso terrestris nunc extet. Est ergo (ut D. Thomas hic recte dixit) hæc res prorsus incognita hominibus, de qua iterum redibit sermo, cum de ascensione Domini agemus.

3. In solutione ad tertium et quartum, multa disserit D. Thomas de apparitionibus Christi post resurrectionem, de quibus insti-tuenda erit sequens disputatio.

ARTICULUS IV.

*Utrum Christus debuerit discipulis in alia effigie apparere*¹.

1. *Ad quartum sic proceditur. Videtur quod Christus non debuerit discipulis in alia effigie apparere. Non enim potest apparere secundum veritatem nisi quod est. Sed in Christo non fuit nisi una effigies. Si ergo Christus in alia effigie apparuit, non fuit apparatio vera, sed ficta; quod est inconveniens, quia, ut August. dicit, in lib. 83 Quæstionum², si fallit Christus, veritas non est; est autem veritas Christus. Ergo videtur quod Christus non debuerit discipulis in alia effigie apparere.*

2. *Præterea, nihil potest in alia effigie apparere quam habeat, nisi oculi intuentum aliquibus præstigiis detineantur. Hujusmodi autem præstigia cum fiant magicis artibus, non convenient Christo, secundum illud 2 ad Cor. 6: Quæ conventio Christi ad Belial? Ergo videtur quod non debuerit in alia effigie apparere.*

3. *Præterea, sicut per sacram Scripturam nostra fides certificatur, ita discipuli certificati sunt de fide resurrectionis, per Christi apparitiones. Sed, sicut Augustinus dicit in Epist. ad Hieronymum³, si vel unum mendacium in sacra Scriptura recipiatur, infirmabitur tota sacra Scriptura auctoritas. Ergo si vel in una apparitione Christus discipulis apparuit aliter quam esset, infirmabitur quidquid discipuli post resurrectionem viderunt in Christo, quod est inconveniens. Non ergo debuit in alia effigie apparere.*

Sed contra est quod dicitur Marc. ult.: Post hac, duobus ex eis ambulantibus ostensus est in alia effigie euntibus in villam.

Respondeo dicendum, quod (sicut dictum

¹ 3, d. 21, q. 2, a. 4, q. 1, ad 3, et op. 60, c. 22 fin.

² Q. 13, tom. 4.

³ Ep. 8, et 9

DISPUTAT. XLIX. SECT. I.

875

est⁴) resurrectio Christi manifestanda fuit hominibus, per modum quo eis divina revelantur. Innotescunt autem divina hominibus diversimode, secundum quod diversimode sunt affecti. Nam illi qui habent mentem bene dispositam, secundum veritatem divina percipiunt. Illi autem qui non habent mentem bene dispositam, divina percipiunt cum quadam confusione dubietatis vel erroris. Animalis enim homo non percipit ea quæ sunt Spiritus Dei, ut dicitur 1 ad Cor. 2. Et ideo Christus, quibusdam ad credendum dispositis, post resurrectionem apparuit in sua effigie. Illis autem in alia effigie apparuit, qui jam videbantur circa fidem tepercere. Unde dicebant: Nos autem sperabamus quia ipse esset redempturus Israel. Unde Gregorius dicit in homil. 2, quod talis se exhibuit eis in corpore, qualis apud illos erat in mente; quia enim adhuc in eorum cordibus peregrinus erat a fide, ire se longius finxit, scilicet, ac si esset peregrinus.

Ad primum ergo dicendum, quod (sicut August. dicit in lib. de Questionibus Evangelii⁵) non omne quod fingimus, mendacium est; sed quando illud fingimus quod nihil significat, tunc est mendacium; cum autem fictio nostra refertur in aliquam significationem, non est mendacium, sed aliqua figura veritatis. Alioquin omnia, quæ a sapientibus et sanctis viris, vel etiam ab ipso Domino figurata dicta sunt, mendacia deputabuntur; quia secundum usitatum intellectum non consistit veritas in talibus dictis. Sicut autem dicta, ita etiam finguntur facta sine mendacio ad aliquam rem significandam. Et ita factum est hic, ut dictum est.

Ad secundum dicendum, quod (sicut August. dicit in lib. de Cons. Evang.⁶) Dominus poterat transformare carnem suam, ut alia revera esset effigies ab illa quam solebant illi intueri; quandoquidem et ante passionem suam transformatus est in monte, ut facies ejus claresceret sicut sol; sed non ita nunc factum est. Non autem incongruenter accipimus hoc impedimentum in oculis eorum a Satana factum fuisse, ne agnosceretur Jesus. Unde Luc. ult. dicitur quod oculi eorum tenebantur, ne eum agnoscerent.

Ad tertium dicendum, quod ratio illa sequetur, si ab alienæ effigiei aspectu non

⁴ Art. 1 et 2 hujus quæst.

⁵ Hom. 23 in Evang., non procul a princ.

⁶ L. 2, cap. ult., in princ., tom. 4.

⁷ L. 3, c. 25, in 2 pag., a pr., t. 4.

fuisserent reducti ad vere videndum Christi effigiem. Sicut enim Augustinus dicit ibid.⁴, tam a Christo facta est permisso, ut, scilicet, prædicto modo oculi eorum tenerentur usque ad fractionem panis, ut unitate corporis ejus participata removeri intelligatur impedimentum inimici, ut Christus possit agnosciri. Unde ibidem subditur, quod aperti sunt oculi eorum, et cognoverunt, non quod ante clausis oculis ambularent, sed inerat aliquid quo non sine-rentur agnoscere quod videbant, quod, scilicet, caligo et aliquis humor efficere solet.

Hic articulus explicatus est quæstione præcedenti, in commentario articuli 1, circa solutionem ad 3. Neque hic aliquid addendum occurrit, præter ea quæ in sequenti disputacione dicemus.

DISPUTATIO XLIX.

In quinque sectiones distributa.

DE APPARITIONIBUS CHRISTI POST RESURRECTIONEM.

Ex historia Evangelica, ut ex doctrina Augustini inferius comprobabimus, decem Christi apparitiones post resurrectionem colligimus, quas hic breviter exponemus, attingendo omnia, in quibus Evangelistæ discrepare videntur, eaque in concordiam redigendo, simulque explicandum erit, an forte aliqua apparatio facta sit, quæ ab Evangelistis non narratur.

SECTIO I.

Utrum Christus Dominus statim post resurrectionem matri suæ, priusquam cæteris omnibus apparuerit.

4. Ratio dubitandi præcipue sumitur ex Marco, asserente Christum primo apparuuisse Mariæ Magdalenæ; quis ergo contra tam expressum testimonium audebit affirmare prius alteri apparuisse, præsertim cum nullus ex antiquis Patribus id affirmare ausus sit? Videntur enim Evangelistæ verba simpliciter et ut sonant intellexisse. Nam si propter dignitatem matris, licet Virginem excipere a generalibus verbis Evangelistæ, eadem ratione licebit excipere, verbi gratia, Petrum vel Joannem, propter singularem eorum dignitatem. Vel certe licebit exponere, Christum primo apparuuisse Magdalenæ inter feminas,

¹ Lib. 3, c. 25, in pag. 2 a princ., t. 4.

non vero inter viros, quia videri potest congruum ut potius apparuerit Petro, quem caput Ecclesiae et Apostolorum principem constitutus erat, quam Mariæ Magdalenæ. Si ergo propter apparentem congruentiam hujusmodi expositio admittenda non est, neque etiam B. Virginem licebit excipere. Et confirmatur, quia nulla est sufficiens ratio neque conjectura quæ vehementer hoc suadeat. Primo, quia plus est videre Christi divinitatem quam gloriam resurgentis, et tamen non fuit B. Virgo prima quæ inter homines vidit Deum. Nam Augustinus et D. Thomas existimant Moysem prius vidisse Deum. Et de animabus Sanctorum Patrum est etiam probabile, quia non est certum B. Virginem vidisse divinitatem ante Christi resurrectionem. Secundo, quia hoc beneficium videndi oculis corporeis Christum resurgentem est quasi temporale et extrinsecum, per se non pertinens ad veram animæ sanctitatem; ergo non fuit necesse Virgini conferri, neque hoc pertinet ad ejus perfectionem. Nam potius ipsem Christus dixit, *beatos esse qui non viderunt et credidérunt*; quasi diceret, videre oculis corporeis nihil referre ad animæ beatitudinem, si absque tali visione vera ac firma fides refineatur. Unde confirmatur tertio, nam Christus apparuit Magdalenæ et aliis, ut eos in fide confirmaret (erant enim nutantes, et imperfecti); B. autem Virgo non indigebat hoc subsidio; erat enim in fide perfectissima. Dices: quamvis B. Virgo fuerit perfectissima in credendo, et hac ratione visione filii non indigerit, egebat tamen consolatione, quia summa tristitia et dolore affecta erat. Rursus, licet visio corporalis per se non pertineat ad sanctitatem animæ, plurimum tamen potuit Virgini ad illam conferre, amorem erga filium excitando et accendendo. Sed contra, quia (ut hæc omnia fateamur), ad summum suadent decuisse ut brevi tempore post resurrectionem suam Christus Virgini appareret, non vero quod ante omnes, quia, licet Virgo non fuisset prima quæ Christum post resurrectionem videret, potuisse eumdem spiritualem fructum eamdemque consolationem ex illius praesentia capere; ergo nihil videtur ad dignitatem et perfectionem Virginis attingere, quod ante omnes Christum viderit resurgentem.

2. Post resurrectionem primo matri suæ Christus apparuit. — Nihilominus absque ultra dubitatione credendum est, Christum post resurrectionem primum omnium matri suæ

apparuisse. Quæ sententia ex ipsis terminis adeo est per se credibilis, ut fere sine controversia, omnium fidelium et Doctorum animis insederit, atque ita docent omnes scriptores Catholicæ qui hanc quæstionem attigerunt. Unde videtur hic fuisse perpetuus Ecclesiæ sensus, quia nullum reperimus initium quando hoc cœperit in Ecclesia doceri. Et quamvis antiqui Patres id frequenter non assent, non ideo est quia contrarium sentirent (nunquam enim hoc negarunt), sed quia solum enarrabant quæ ab Evangelistis scripta sunt. Neque vero omnino desunt nobis antiquitatis vestigia et testimonia. Nam Ambrosius, l. 3 de Virgin., aliquantulum a principio, expresse id affirmat his verbis: *Vidit ergo Maria resurrectionem Domini, et prima vidi et credidit. Vidi et Maria Magdalena, quamvis adhuc ista nutaret.* Citari etiam solet Greg. Naz., orat. 42, quæst. 2 de Resurr., ubi nihil aperte dicit, sed potius in fine illius orationis significat Virginem simul cum aliis mulieribus ivisse ad sepulcrum; quod clarius dicit in Tragœdia de Christo paciente. Et idem sentit Greg. Nyss., Orat. 3 de Resur., et Sedulius, l. 5 Paschalium carminum, in fine. Quod (ut in superioribus diximus) verisimile non est, nec B. Virginem decens, neque ejus fidei consentaneum; quin etiam neque Evangelii conforme, ut inferius yidebimus. Docuit autem expresse hanc sententiam Sedulius paulo inferius his carminibus:

Discedat synagoga suo fuscata colore.
Ecclesiam pulchro Christus sibi junxit amore,
Hæc est conspicio radians in honore Mariæ,
Quæ cum clarifico semper sit nomine mater,
Semper virgo manet. Hujus sevisibus adstans
Luce palam Dominus prius obtulit, ut bona mater
Grandia divulgans miracula, quæ fuit olim
Advenientis iter, hæc sit redeuntis et index.

3. Christum post resurrectionem suam apparere matri decentissimum. — Optime Anselmus, de Excell. Virginis, c. 6, dicit, immensitatem gaudii quo in hac filii apparitione Virgo perfusa est, Angelis fuisse admirandam, hominibus autem inenarrabilem. Deinde vero rogat cur Evangelistæ non narrarent Christum primo ac præcipue matri apparuisse. Respondetque primo, quia hoc videri poterat superfluum; deinde ne viderentur reginam cœli et terræ, cæteris, quibus Christus apparuit, coæquare: *Spiritus (inquit) ejus in illa plene ac perfecte quiescebat, qui sibi et esse illius, et facta ejus omnia luce clarius revelabat, et Evangelistæ scriberent tunc vel*

tunc talem semet illi exhibuisse! Idem Bonavent., in Meditat. vitæ Christi, c. 87. Tandem Rupert., l. 7 de Divin. offic., c. 25. ostendens antiquam traditionem, dicit recte a majoribus traditum esse, ut in processionibus diei Dominicæ prima statio et salutatio fiat ad B. Virginem: *Gestit enim (inquit) Christiana de rotio perpendere, quantus torrens gaudii repente inundans animam ejus ferro doloris confessam inebriarit, cum reditus filius illi ante omnes fortasse mortales, materno Virginem non defraudans honore, victoriam suam annunciat.* Et infra: *Verissime igitur matri filius resurgens apparuit; sed illa, ut ab initio cœperat, ita et nunc conservabat omnia verba hæc, conferens in corde suo. Quod si iācirco verum non videretur, quia nullus Evangelistarum scriptis hoc attestatur, consequens est quod nunquam post resurrectionem suam visus sit matri, quia quando rel ubi apparuerit illi, nullus eorum dixit. Sed absit hoc ab illo qui in lege sua patrem et matrem honorare præcepit, absit, inquam, ut matrem propter se doloris gladio transverberatam tam dura negligenter talis filius inhonoraverit. Non sic Apostolica sanctæ Romanæ Ecclesiæ sensit veritas, quæ hanc beatam Jerusalem in principio lætitiae sue posuit.* Et infra dicit Christum, mox ut surrexit, dixisse: *Vadam ad montem myrræ, et ad collum thuris. Qua enim sui corporis parte altius post Christum Ecclesiæ sublimitas enituit, quam singularibus hujus Reginæ Angelorum meritis; et quo in vertice montium tantum myrræ et thuris, id est, mortificationis et orationis inveniri potuit, quantum in hujus Virginis anima, quam singulariter Dominicæ passionis gladius pertransierat?* In quibus Ruperti verbis multæ conjecturæ continentur ad hanc veritatem persuadendam, et ideo omnia retuli. Et ibidem respondet Rupertus ad locum Marci, dicens, Evangelistas solum retulisse eas apparitiones quæ factæ sunt in testimonium veræ resurrectionis, juxta illud Act. 10: *Dedit eum manifestum fieri non omni populo, sed testibus præordinatis a Deo.* Non enim assumperunt onus scribendi omnia quæ Christus gessit, neque omnia singularia officia quæ matri exhibuit, sed ea tantum quæ ad mysteria fidei confirmanda et referenda sufficere visa sunt. Cum ergo dicitur Christus primo apparuisse Marie Magdalenæ, intelligentum est vel inter eos qui futuri erant testes resurrectionis, de quibus Evangelistæ scribebant, vel inter eos quibus Christus apparuit ad eorum fidem confirman-

dam. Quocirea in hoc numero B. Virgo non comprehenditur. Quia nec futura erat testis resurrectionis, ne ob filii amorem aliquid fingere existimaretur; neque de fide resurrectionis aliquando fuit incerta. Et ideo non propter hanc causam ei Christus primo apparuit; sed ut debitam amoris et honoris significationem præberet. Ex quo fit ut non solum censeamus Virginis concessum esse hoc beneficium propter commodum ejus; sed etiam quia ipsum Christum hoc maxime decebat. Tum quia, ut filius, debuit singulariter honore matrem; tum etiam quia, cum ab ipsa maxime diligetur, debuit etiam singularia amoris signa rependere. Unde necesse fuit ut hoc singulari beneficio fides, spes et charitas Virginis in Christum plurimum crescerent; ac confirmarentur. Atque ex his facile expediunt rationes omnes dubitandi in principio positæ.

SECTIO II.

Quæ et quot fuerint mulieres quibus Christus suscitatus apparuit.

1. Incipimus sermonem instituere de apparitionibus, quot ab Evangelistis narrantur; et quoniam simul scribunt de Magdalena et aliis feminis, oportet prius nonnulla præmittere de illarum numero, et quæ illæ fuerint declarare. Non agemus autem quo tempore profectæ sint ad monumentum. Quoniam dæ hac re in superioribus disseruimus, tractantes de tempore Dominicæ resurrectionis, ubi verba Evangelistarum huc spectantia exposuimus et in concordiam redigimus.

2. In hac ergo questione, circa numerum harum mulierum, videtur esse quedam diversitas in Evangelistis. Nam Joannes solius Mariæ Magdalenæ meminit; Matthæus addidit alteram Mariam; Marcus adjunxit Salome, et non dixit alteram Mariam, sed Mariam Jacobi. Tandem Lucas, prætermissa Salome, nominat Joannam, cum aliis duabus Mariis, et subdit verba generalia, nimirum, profetas simul cæteras, quæ cum eis erant. Propter hæc posset aliquis suspicari Evangelistas fuisse locutos de diversis feminis, et de variis profectionibus earum; quod significavit Hieronymus, verbis quibusdam generalibus, Matthæi 28, et ep. 150 ad Hedibiam, quæst. 4 et 5, ubi significat Magdalenam prius venisse cum aliis, postea vero solam. Alli autem e contrario (ut ibidem refert) dixerunt prius venisse solam (prout Joannem indicare cen-

sebant), postea vero cum aliis. Similia habet Nicephorus, lib. I Histor., cap. 33, ubi multa alia dicit, quæ probari nullo modo possunt. Omitto Ambrosium, et alios qui dicunt fuisse plures Magdalenas, et alteram venisse solam; alteram vero cum reliquis feminis. Hoc enim falso nisi fundamento statim ostendemus. Quamobrem, quicquid sit de aliis profectiōibus vel itineribus ab iis mulieribus factis, postquam primo ad monumentum pervenerunt (de quibus postea dicemus), tamen quod omnes Evangelistæ incipientes narrare historiam resurrectionis, quando eas primo nominant, loquantur de eadem re, atque adeo de eisdem mulieribus, et de prima profectione earum ad monumentum, certum est, et expresse id docet Hieronymus citato loco, et ex verbis Evangelistarum satis aperte constat. Ideo enim omnes commemorant ivisse mulieres valde mane, statim ac elapsa fuit nocte Sabbathi; omnes etiam referunt tunc primo vidisse lapidem sublatum. Deinde, supra ostendimus, quod ad præsentem profectionem mulierum spectat, omnes Evangelistas de eodem tempore horaque esse locutos. Præterea, si prius Magdalena venit sola, et vidit lapidem sublatum, quomodo postea rediens cum aliis feminis dicebat: *Quis revolvet nobis lapidem?* Si vero prius venit cum aliis feminis, et cum eis vidit lapidem sublatum, ergo statim rediit ad id nuntiandum Apostolis, ut Joannes narrat; ergo quoad hoc loquuntur omnes Evangelistæ de eadem mulierum profectione; ergo et de eisdem mulieribus. Tandem varietas proposita nullam infert difficultatem. Nam Evangelista, qui pauciores mulieres exprimit, non excludit alias; omnes ergo quæ ab omnibus simul connumerantur, profectæ fuerunt, quamvis non omnes a singulis enumerentur.

3. Ex dicta igitur narratione saltem constat ivisse tres mulieres, quarum nomina Evangelistæ recensent, et præterea alias; quot autem illæ fuerint, incertum est, solumque affirmari potest fuisse plures, cum Luc. in plurali loquatur, dicens: *Ceteræ, quæ cum eis erant.* Deinde etiam est incertum an illæ, quæ nominatum exprimuntur, fuerint tres, vel quatuor, vel quinque; primum, quia non constat an illa quam Matth. vocavit alteram Mariam, sit alia ab ea quam vocarunt Marc. et Luc. *Mariam Jacobi.* Verisimilius autem existimo esse eamdem, ut superius dixi; quia, cap. 27, idem Mat. cum Maria Magdalena tantum recensuit Mariam Jacobi, quam

statim ibi vocavit alteram Mariam. Est igitur fere evidens eamdem referri cap. 28. Rursus dubium est an Joanna et Salome apud Lucam et Marcum sint distinctæ personæ, vel potius eadem, quæ fortasse erat binomia; probabilius vero est esse diversas personas. Una enim erat uxor Zebedæi, altera Chusæ, ut dicemus. Illud etiam poterat hic dubitari, an Maria Magdalena, de qua hic loquuntur Evangelistæ, sit una et eadem persona, vel duplex ejusdem nominis. Sed de hoc dicemus in sequenti punto; quare hæc sufficiant de numero harum mulierum.

4. *Dubium de Maria Magdalena.* — Quod attinet ad secundum, quæ fuerint hæc mulieres, omissis iis quarum nomina reticentur, de quibus nihil dici potest, de Joanna mentionem fecit Luc., cap. 8, dicens fuisse uxorem Chusæ, procuratoris Herodis. De Salome vero, disp. 5, sect. 4, ostendimus esse verisimilius illam esse quæ in Evangelio dicitur *mater filiorum Zebedæi*, ut colligitur ex Marco 15, simul cum Matt. 27, et ibidem ostendimus hanc mulierem nunquam ab Evangelistis vocari *Mariam*. Rursus de Maria Jacobi in citato loco etiam explicui quæ fuit, et late refutavi sententiam opinantium, hanc vel illam, quam Matth. 4, vocavit alteram Mariam, fuisse Virginem beatissimam.

5. Tota ergo difficultas revocatur ad Mariam Magdalenam, utrum, scilicet, fuerit illa quæ in Evangelio dicitur *soror Marthæ et Lazari*, an alia; vel utrum fuerint plures quæ ad monumentum Domini venerunt. Fuit enim aliquorum Patrum sententia, ut Hieronymus refert, dicta quæst. 4, ad Hedibiam, et Eusebius Cæsariensis, in ep. ad Marinum, non esse eamdem Magdalenam de qua hic loquuntur Evangelistæ; quia Matth. refert, et idem sentit Marcus, Christum apparuisse Magdalenæ, quando summo mane profecta est ad monumentum; Joannes autem dicit post illam apparitionem persistisse plorantem juxta monumentum, *quia tulerunt Dominum.* Ergo hæc nondum viderat Christum; sunt ergo diversæ. Et Eusebius addit argumentum, quia Magdalena apud Joannem non est permissa tangere Christum, cum illi apparuit; apud alios autem Evangelistas permissa est illum tangere cum aliis mulieribus; non est ergo eadem. Deinde Marcus, dicens primo apparuisse Magdalenæ, addidit: *De qua ejecerat septem dæmonia*, quod non alia ratione fecisse videtur, nisi ut eam distingueret ab alia Magdalena non peccatrice, quæ erat

soror Lazari. Et ita has duas distinguunt Clemens Papa, l. 3 Constit., c. 6; Origenes, tract. 35 in Math., et hom. 4 in Cant., ex iis quæ Hieron. transtulit; Chrysostomus, hom. 61 in Joann., et 81 in Matth.; Macarius Egyptius, homil. 12 quem refert Turrianus super Clementem; Theophylact., Marc. 44; Hieron. et Euthym., Matth. 26, qui omnes distinguunt Magdalenam peccatricem a Maria sorore Lazari, quamvis non dicant utriusque fieri mentionem in apparitione resurrectionis, sed vel de hoc taceant, vel potius censeant solam Magdalenam peccatricem esse illam quæ quæsivit Dominum in monumento, cuique Christus apparuit. Atque hanc distinctionem Magdalenæ peccatricis a sorore Lazari, probabilem vel dubiam relinquit Augustinus, tractatu quadragesimo nono in Joannem. Sunt etiam qui, præter Mariam sororem Lazari, duas Magdalenas peccatrices fuisse opinentur, ut refert Eusebius supra, et opinatus est Photius Constantinopolitanus, apud Turrianum supra. Pro qua sententia ex recontioribus scripserunt Jacobus Faber, et Jodocus Chlichtoveus. Sed non est sententia probabilis, neque habet fundamentum in Evangelio, ut videbimus. Alia vero, quæ distinguunt Magdalenam a Maria sorore Lazari, est fortasse utcumque probabilis; non est tamen præsenti instituto necessaria, nec simpliciter vera.

6. *Maria Magdalena, de qua in apparitionibus resurrectionis Evangelium loquitur, una, non plures.* — Dicendum itaque primo est, unam solam esse Mariam Magdalenam, de qua Evangelistæ loquuntur in apparitionibus resurrectionis. Hæc est sententia omnium Patrum et expositorum super Evangelia, et in aliis locis quæ statim referam. Hieronymus autem et Eusebius, licet contrariam opinionem referant, non tamen probant. Et probatur de Evangelio Joannis; nam de cæteris neque est ulla difficultas, neque ullus in controversiam id adduxit. Et primum, quod Joannes in suo contextu de una et eadem Maria Magdalena loquatur, patet, quia, cum prius dixisset Mariam Magdalenam venisse in monumentum, et viso lapide sublato vocasse Petrum et Joannem, eosque venisse, postea que recessisse, subdit: *Maria autem stabat*, etc. Quibus verbis manifeste facit relationem ad eam Mariam de qua prius minerat; de qua quoque postea concludit: *Venit Maria Magdalena, annuntians discipulis*, etc. Loquitur ergo manifeste de eadem

muliere, neque aliud fingi potest sine magna æquivocatione et corruptione contextus. Neque contra hoc obstat difficultas quam supra tetigit Hieronymus. Assumit enim falsum, scilicet, Magdalenam in prima profectione ad monumentum, Christum Dominum suscitatum vidisse. Id enim neque ex Joanne, neque ex aliis Evangelistis colligitur, ut in sequentibus ostendemus. Deinde, quod Joannes de eadem loquatur de qua cæteri Evangelistæ, constat primo ex identitate nominis. Hæc enim conjectura non est contemnenda, quando nihil est quod cogat ad distinguendas personas, et præsertim in narratione ejusdem historiæ, eodem tempore, et de eodem facto. Quod autem in præsenti nihil sit quod cogat, patet, quia solum potest fieri argumentum supra propositum ex Eusebio. Illud autem facile expedit Hieronymus, dicta quæst. 4, ad Hedibiam, et epist. 148 ad Marcellam; et Eusebius supra, quem refert Anastasius Nicænus, lib. Quæstion. in Scripturam, quæst. 90. Dicunt igitur illas duas apparitiones fuisse diversas, et in priori rejectam esse Magdalenam ut incredulam, seu in fide imperfectam; in posteriori vero, vel eamdem Magdalenam jam in fide corroboratam, vel alias mulieres jam credentes permissas esse Christum tangere. Que responsio (quod ad fidem historiæ attinet) est verissima; quoad rationem vero, quam reddit de facto Christi, alia fortasse est magis litteralis, quæ omnia in sequentibus latius constabunt. Nulla igitur est illa conjectura. Aliunde vero ex contextu Joannis colligitur, in principio capituli vigesimi aperte loqui de prima profectione mulierum ad monumentum, de qua loquuntur alii Evangelistæ, ut supra etiam notavimus. Deinde probabiliter ex eo colligitur Christum primo apparuisse Magdalenæ, sicut Marcus affirmat, et infra videbimus; signum ergo est utrumque de eadem loqui.

7. *Maria Magdalena a dæmonibus liberata.* — *Homines vexari a dæmons cur permittit Deus.* — Secundo, dicendum est hanc Mariam Magdalenam, cui Christus primo apparuit, fuisse sororem Lazari. Hanc sententiam existimo longe probabilem; probanda vero est ex duobus principiis. Primum est, hanc Magdalenam, cui Christus primo apparuit, fuisse mulierem peccatricem, quæ illius pedes unxerat, Lucæ 7. Quod Patres colligunt ex illis verbis Marci: *De qua septem dæmonia ejecerat*, per quæ omnia genera peccatorum intelligunt, ita ut sensus sit, Christum liberasse il-